

Pattukhangnga.

1 Gwa anu han hempfalay an cha Empfangad ay Empfangachon.

2 Cha tay anu an hempfalay ja unagkhu kaykhu atag oh-ohha an empfalay cha ja i cha penatoy hi ama na ja hi ina na khu.

3 Cha tay an hempfalay an cha Empfangad ay Empfangachon ja cho-or chi pajaw cha ja gway pfuhi cha ja gway khangha cha ja uchumna pay hi khina-u cha hi nehaha'pfa ay chuy pfalay cha.

4 Unot atag agkhuy immilog hichin oh-ohha an empfalay cha an hi Pattukhangnga ja ja allon allon anu hachi a-akhi na hi, <<Ta un ta-o porhon hitay uchumna an khina-un cha Empfangad ay Empfangachon.>>

5 Amat hichi ja hachi anu a-akhin ama na ja immali cha hon, anong un gwa hi Pattukhangnga atag angnge an empfalay cha, hon nun-ala cha chin penpenhod cha an khina-u hon allon cha hi, <<Ijam ta alan mi hay hatokhangha ti gwa han enalan amam ay cha'mi.>>

6 Khun anu atag kumila hi Pattukhangnga.

7 Amat hichi ja enala cha khu chin pajaw na.

8 Ja immuy khu hachi a-akhi na ja i cha khu nuntamuwan.

9 Nun-iliya' cha hachi pajaw Pattukhangnga.

10 Ja amat hichi ken ja ma-id atag hay allon cha hi pe'pajaw Pattukhangnga.

11 Chin pakhuy cha an nahagwar ja hichuy chi khuna anun.

12 Unot amat hichi ja khun omer-ellog atag muti un cha ab-apfohlan.

13 Unchanai atag ta gwa hay khagwong hay amat hina hi cholar ja hana mamahang ja mi'pfulog ayya hi Pattukhangnga ja achi cha pitnuchon an un khun mangu-udchichi.

14 Unchanai hon nunhongotan cha hini chalan an pe-e'gwana.

15 Allon Pattukhangnga hi, <<Nga chah ni' chi pohod na ay tay pi'takhuwan?>>

16 Amat hichi ja empacheh na an mumpfangngad an immuy hi pfalay cha.

17 Nonnomnom ja khun kumkummila.

18 <<Nga khu un la-ahna ja ma-id pohod na ta umuja' atag hingiton nu nga chah chi immajan cha ama ay ina. Ammuna un ta atag mi'pfulog ja achi chita pitnuchon.>>

19 Amat hichi ja ente-a na an mun-olot.

20 Enolot na anu han toloh nabto' ja inunga-ungar na an ib-ibpfaju.

21 Gwa an napfalín an impfaju na ay chuy an arkhaw, ja enala na ja tenapana ja initto na chin pfontong.

22 Ja enala na chin lahot ama na ja initto na hay hachi pfokhah ja hachi pfanga ja hachi id-idjuloh na ja te'mar na.

23 Nun-ingwi'gwiit ja pfimmutay ay chuy partug cha ja temmata'chug.

24 Allona hi, <<Nga khu ton machoto' hi uja' pang-edchongan hi immajan cha ama ay ina?>>

25 Unot amat hichi ja allona hi, <<Ijam ta un la-ahna ja hihinlong u hitay gwangwang ta un nangamong.>>

26 Amat hichi ja empacheh na anu ja khun umu-umu-umu'-umuy.

27 Unot gwa an khun maha'-ad ja munhenaang chin unga an hi Pattukhangnga.

28 Amat hichi ja inta'chug na ja i nunhakha'-ang anu atag ay ni pingngit chi gwangwang.

29 Gwaot anu an napfalín an nangan ja inhakhupit na khu chin lahot na.

30 Ja empacheh na anu ja khun anu atag umu-umu'-umuy.

31 Unagkhu la-ahna ja immuy ay chuy achaan chi pfuludna ja napogpog chin gwangwang.

32 Inti-id na ja gwa anu han tinnig na an pfuglay.

33 Ja khuna anu allon hi, <<Patupatukhangnga, teneytaynan cha ama na ay ina na.>>

34 Chengngor anu hachi takhu ja khun cha allon hi, <<Ma-id makay anila mi atag ay nuy an hi امام. Hotti khun a ken umu'-umuy.>>

35 Amat hichi anu atag ja empacheh na ja khun muntimunti'ti'-id chin unga an hi Pattukhangnga.

36 Ja khun umu'-umuy ja chinakngana khu han pfuludna ja michayyu.

37 Ja allona khu hi, <<Patupatukhangnga, an teneytaynan atag cha ama na ay ina na.>>

38 Amat hichi khu ja empacheh na.

39 Khun umu-umu-umu'-umuy ja chinakngana anu han anchu-anchu-oy an ti-ichan.

40 Ja allona hi, <<Anagkha ay chita angnge ta anchu-anchu'-oy hitay an ti-ichan.>>

41 Gwa anu an homelong, ja allona hi, <<Munnanonga' ay chita ay tay ti tayya an homelong ja achi matikhaw chi agwu'.>>

42 Amat hichi anu atag ja inta'chug na.

43 Ja tinnig na anu atag hay achaan chi pfato ja enggwallang na chin lahhot na ja enala na ja nun-apoy.

44 Ja nunhakha'-ang ay chuy.

45 Ja ay chuy anu atag chi nanganana ja ay chuy pfato ja oto'togna ja nanallo'.

46 Ja gwa an na'-arkhaw ja enelana ja inana chin agkhuy na.

47 Nangan anu atag chin unga an hi Pattukhangnga ja allona hi, <<Ijam ta munti-icha' khu ta nangamong un u adchiya ti-ichan hitay anchu-anchu-oy an ti-ichan ta nangamong ken hay uja' chakngan.>>

48 Amat hichi ja khun umu'-umuy ay chuy an pfuludna ja nunchochottar.

49 Tinnig na anu hay hachi ne-ohha-ohha an pfalay.

50 Muti hachi an pfalay ja ma-id ppopfong na an nabnab-on ja ma-id homerher an un cha khomegkhenong hachi an tatakhu.

51 Immuy anu ja gwa han penghan chi pfalay an agwuna.

52 Ja inta'chug na anu ay ni agwichan.

53 Inali na khu hi, <<Patupatukhangnga, an teneytaynan atag cha ama na ay ina na.>>

54 Ja chengngor han ohan lala-e ja pfimmutay.

55 Unagkhu intikhaw Pattukhangnga ay chuy lala-e ja un khu'khu' hichi ulu na!

56 Ja nun-arhong hachi mata na an amat hi paang.

57 Ja temma-ot anu hi Pattukhangnga muti enegpor na kan.

58 Allona hi, <<Me'hapita'.>>

59 Allon anu chin lala-e hi, <<Anah un la-ahna ja umali a heto an un ta makay matoy un ta uma heto. Anah un la-ahna ja he-a an unga ja un a uma heto?>>

60 Ja allona hi, <<Ti aa atag, ti un amat heto an una' enapfohlan atag an una' it-ittang ja natoy cha ama ay ina ja enapfohlana' hay hana a-akhin cha ama. Ja numpoloh cha chin khina-u mi ja chin pajaw mi ja una' atag enapfoholan. Ma-id pohod na hi pi'takhuwa' hot un u akkay tikhagwun cha ama ay ina.>>

61 Amat hichi anu ja allona hi, <<Aa. Nga chah ni ngachan mu?>>

62 Ja allona hi, <<Aa, ha-in hi Pattukhangnga.>>

63 Allona hi, <<Nga chah chi hi امام?>>

64 Inalin Pattukhangnga hini ngachana.

65 Ja allona hi, <<Nga chah chi hi inam?>>

66 Inalina khu hini ngachan inana.

67 Ja allona hi, <<Ha-in ay chita angnge. Ha-in hi امام! Muti tayya an.....>>

68 Ja inalin gwot Pattukhangnga hi, <<Hot he-a hi ama?>>

69 Inalinay, <<Aa, ha-in.>>

70 Allona hi, <<Anagkha mah ta ma-id chin ulum? Achi ja' amat hina chin ulum. Ja achi amat hina chin angah mu.>>

71 Ja allonah, <<Aa, ken, ti una' i ne'ngajaw ja inaan cha chin ulu' ja enlajaw cha ja tan un khu'khu' hitay in-u-ulu'.>>

72 Amat hichi ja hinanhanan ama na, <<Nga chah chi atag enat mu an chimmalan?>>

73 Ja hinudhud na an allona hi, <<Una' nunnanong heot chalan ja tan emmatama'.>>

74 Ja allon ama na hi, <<Aa, ay chita, hotti achi a mapfajag heto atag. Ti un chah ma-id ta-ot mu an matoy ta un ta umalih to. Hotti anong kay un amat hina ja mahapor an mumpfangngad a hichi lota.>>

75 Ja allona hi, <<Angnga' ni'. Achiya' mangkay ti unchani ja penatoja' hana a-akhim.>>

76 Ja allonay, <<Achi an mumpfangngad a atag ta una' mangunud ta umuja' ta me'hapita' ay chicha ta pun-epfangngad cha chin khina-u an nun-ala cha.>>

77 Ja allonay, <<Aa, muti tan achawwi mangkay hitay enenggwa'.>>

78 Allona hi, <<Achi an umuy ta ken ay chi pangngerna an partug.>>

79 Enala na anu chin hu'-ud na ja inchuhag na ay chuy tigtig cha ja inu-ugnan chi unga.

80 Unagkhu inimit na ja temmata'chug hi Pattukhangnga hichin partug cha.

81 Amat hichi anu ja khuna anu atag umu-umungon chin cho-or an o-it ay chi pfalay cha.

82 Ti chenor anu atag chin hakhokhong cha ja chin uchumna an mabmapfohhor ja i cha nuntapalan chin pfalay cha hi khinalot ja hi o-it ja numpetla-an cha chin uleng cha ja chin haggaw cha.

83 Unot gwa an una etaytay ja gwahna khu hi ama na an nangunud.

84 Temmata'chug ja allonay, <<Aa.>>

85 Munhapihapit hi ama na an allona hi, <<An un kaykhu hijah tay ay cha'ju chi aton hana a-akhi'.>>

86 Mun-ali-ali an mango-otong an munhapit ja allona hi, <<Chad aju mah, ton hahakhokhong? Ma-among aju adchiya.>>

87 Ja un anu gwachinonon anu chin hahakhokhong cha hon ento'to'gwar cha.

88 <<Anagkha, nga chah nuy immali an lala-e an khun munhapihapit an amat hi hapit Empfangachon?>>

88 Gwachinonon ja un cha or-orlayyan an umali hina pfalay cha Pattukhangnga.

89 Immali cha ja na-among cha chin hahakhokhong cha.

90 Mapfungot anu ken hi Empfangachon an allona hi, <<Anah un la-ahna ja una' agkhu natoy ja i ju aton heto hitay nunhittugwan mi an iju puntatapalan ja iju punpetla-an? Uma aju ta pun-omong ju hato khinalot. Umungon ju an amin ja inulahan ju hay hachi iju nun-epetla'. Ja allon ju hay hana a-akhi' ta mumpanga-ali cha.>>

91 Empapfokha cha chin a-akhi na ja gwa an khun cha pon-omong chin khinalot hachi hakhokhong cha.

92 Tomatta-ot cha ken ti un cha i mohgwaton chin angah na hon amat hi angah chi nihahachag hi natoy.

93 Amat hichi ja makhalakhar cha an i mangulahan chin pito'.

94 Unot achi mahop ja gwacha hachi a-akhi na an khun cha mun-ollo-ollong an umali.

95 Ja khun ken mango-ottong hi Empfangachon an allona hi, <<Nga chah chi nemnomnom ju ta la-ahna ja una' agkhu natoy ja iju numpoloh hitay pajaw ja chin khina-u mi?>>

96 Amat hichi ja allon cha hi, <<Achi atag, an epfangngad mi.>>

97 Empfangngad cha ken ja gwachinonon hon i cha pini-ug chin pfuhi ja hay hachi khangha ja hachi uchumna an khina-u an un ammuna hachi tapfa' hon nun-elajaw cha.

98 Muti ay chuy ja an amin ja nun-epfangngapfangngad cha.

99 Ja allon cha hi, <<Achi a ad ni' amat hina ta achi cha'mi ijagwon.>>

100 Allon chin a-akhi na hi, <<Tan epfangngad mi an amin chin khina-u ju ja achi mi atag apfohlan hitay empfalay mu an ipfilang mi ad ugwani an empfalay mi.>>

101 Allona hi, <<Aa, tugwali, ti titigkha' makay nu nga chah nuy i ju aton ja umaliya' ja inijaw u cha'ju.>>

102 Ja allon cha hi, <<Achi tatagwa.>>

103 Empfangngad cha ken hay hachi ja allon cha hi, <<Ipfilang mi tatagwa he-a, Pattukhangnga, hotti achi a atag tomatta-ot ay cha'mi ad ugwani. Ja ipfilang mu cha'mi hi ammod ay he-a.>>

104 Allon Pattukhangnga hi, <<Mu aa, adni' anhan ti tayya an ma-id cha ama ay ina ja cha'ju anhan chi mammamhod ay ha-in ja cha'ju chi umaliya' hi amat hi ammod u.>>

105 Amat hichi ja allon cha hi, <<Aa, atag.>>

106 Amat hichi ja allon ama na an hi Empfangachon hi, <<Ot tayya an tan umuja'.>>

107 Empacheh na ken ja alina ja unagkhu la-ahna ja na-utaw.

108 Ja ay chuy mahpay ja hinalimunan cha hi Pattukhangnga.

109 Ja hay anu pfalay cha Pattukhangnga hi negpongana ja heto ad Chumang hichi ad Pfitaor.

110 Ja gwahna han pfuhi an inahho an allon cha an inchat ama na ay Pattukhangnga an allona hi, <<Tayya ta ijuy mu hichi pfalay ta-o ta khun mu pangnomnomnomon ay ha-in.>>

111 Ja ad ugwani ja gwahna anu hichi ad Pfitaor hinuy inahho an amat hi pfuhi an khun cha anu pangittugwan hi pfupfud.

112 Ja hichuy chi achaa chi pfalay cha.

113 Ja angkhay.